

# Հայկական ԽՍՀ Գերագույն խորհրդի

## Ո Ր Ո Շ Ո Ւ Մ Ը

ՌԵԳԻՆՈՒՄ ԻՐԱՎԻՃԱԿԻ ՍՐՄԱՆ ՈՒ ՀԱՅԱՍՏԱՆԻ ԵՎ ԼՂԻՄ-Ի

ՇՐՋԱՓԱԿՄԱՆ ՎԵՐԱՑՄԱՆ ԱՆՀԵՏԱԶ ԳԵԼԻ ՄԻՋՈՑԱՌՈՒՄՆԵՐԻ ՄԱՍԻՆ

Հայկական ԽՍՀ Գերագույն խորհուրդը նշում է, որ արդեն երկրորդ ամիսն է, ինչ Հայկական ԽՍՀ-ն և երկրորդ տարին է, ինչ Լեռնային Ղարաբաղը կանխամտածված շրջափակված են Ադրբեջանական ԽՍՀ-ի կողմից:

Այդ կազմակերպված գործողությունը հետապնդում է քաղաքական նպատակներ՝ ուժի ներգործությամբ թույլ չտալ դեմոկրատական և իրավական ճանապարհով լուծելու ԼՂԻՄ-ի պրոբլեմը, ճնշման ուղիով իրագործել հեռուն գնացող նպատակներ:

Հայկական ԽՍՀ-ի և ԼՂԻՄ-ի շրջափակումը անհամատեղելի է ԽՍՀՄ կազմավորման պայմա-

նագրի, նրա գործող սահմանադրության, ՄԱԿ-ի կանոնադրության, Հելսինկիի եզրափակիչ ակտի և այլ միջազգային պայմանագրերի հետ, որոնց տակ կա նաև Խորհրդային Միության ստորագրությունը:

Իր մասշտաբներով և դաժանությամբ աննախադեպ այդ շրջափակումը փաստորեն արգելակում է երկրաշարժի հետևանքների վերացմանն ուղղված՝ երկրի բոլոր հանրապետությունների, երկրամասերի ու մարզերի, արտասահմանյան պետությունների, միջազգային կարմիր խաչի և մյուս կազմակերպությունների կողմից միջոցառումների իրականացումը, խարխուլում է խորհրդա-



յին ֆեդերացիայի հիմքերը, անուղղելի վնաս հասցնում մեր երկրի միջազգային հեղինակությունը:

Շրջափակումը զգալի հարված է հասցրել նախ և առաջ երկրաշարժից տուժած շրջանների բնակչությանը, երեխաներին, հիվանդներին, ծերերին, կարիքավոր քաղաքացիներին և փախստականներին: Հայաստանում կա ավելի քան 700 հազար անօթևան մարդ, տասնչափ հազարները գոհվեցին երկրաշարժի ժամանակ, ավելի քան 3 հազար մարդ հաշմանդամ դարձավ, 957 երեխա լրիվ որբացավ, իսկ 5271-ը զրկվեց ծնողներից որևէ մեկից:

Նստաշրջանը նշում է, որ ռեգիոնում իրադրությունը նորմալացնելու, հատկապես տրանսպորտի անխափան աշխատանքը ապահովելու մասին ԽՄԿԿ Կենտկոմի բյուրոյում երկու հանրապետությունների կոմկուսների կենտկոմների համատեղ նիստում պայմանավորվածությունից հետո էլ Ադրբեյջանական ԽՍՀ-ն ոչ միայն չի կատարել իր պարտավորությունները, այլև մինչև վերջ և ամբողջովին փակել է դեպի Հայաստան և ԼՂԻՄ տանող երկաթուղային և ավտոմոբիլային բոլոր մայրուղիները:

Հայկական ԽՍՀ Գերագույն խորհրդի նստաշրջանը նշում է, որ արդի միջազգային հարաբերություններում բլոկադայի կենսագործումը դիտվում է որպես պատերազմի ակտ:

Արտահայտելով ժողովրդի կամքը, Հայկական Խորհրդային Սոցիալիստական Հանրապետության Գերագույն խորհուրդը որոշում է.

1. Վճռականորեն դատապարտել Ադրբեյջանական ԽՍՀ-ի կողմից Հայկական ԽՍՀ-ի և ԼՂԻՄ-ի շրջափակման կազմակերպումը: Նշել, որ այն ոչ թե տնտեսական, այլ քաղաքական նպատակամետ ակտ է դեմոկրատական ճանապարհով ԼՂԻՄ-ի պրոբլեմի արդարացի լուծմանը ուժի օգնությամբ խանգարելու համար:

2. Հաշվի առնելով, որ Ադրբեյջանական երկաթուղագիծը, ինչպես և մյուս ճանապարհները, օգտվում են անձեռնմխելիությունից, պահանջել ԽՍՀՄ Գերագույն խորհրդի նախագահությունից և ԽՍՀՄ Մինիստրների խորհրդից՝ դրանք հայտարարել ռազմական դրության մեջ, ապահովելով Հայկական ԽՍՀ և ԼՂԻՄ եկող տրանսպորտի բոլոր տեսակների ազատ և անվտանգ երթևեկությունը:

3. Պահանջել ԽՍՀՄ սահմանադրությանը համապատասխան հրավիրել ԽՍՀՄ ժողովրդական դեպուտատների արտահերթ համագումար՝ շրջափակումը վերացնելու նպատակով արտակարգ միջոցառումներ ընդունելու համար:

4. Հաշվի առնելով շրջափակման հետևանքով ժողովրդատնտեսական բեռների առաքման ա-

պարեզում թույլ տրված ճեղքվածքը և գյուղատնտեսության ու արդյունաբերության ասպարեզում առաջացած կորուստները, ԽՍՀՄ Մինիստրների խորհրդի առջև հարց բարձրացնել խոշոր մասշտաբներով ժողովրդատնտեսական բեռներ Հայաստան փոխադրելու նպատակով քաղաքացիական և ռազմատրանսպորտային ավիացիան ներգրավելու մասին՝ շրջափակման հետևանքով առաջացած պարենային և նյութական մյուս ռեսուրսների ֆոնդերն ու կորուստները համարելու համար:

5. Արտակարգ միջոցներ ձեռնարկել ԽՍՀՄ Մինիստրների խորհրդի կողմից տուժածներին հատկացված 31 հազար վագոն-տնակները և մյուս ապրանքներն ու նյութերը աղետի գոտի հասցնելու համար:

6. Հարց բարձրացնել ԽՍՀՄ Մինիստրների խորհրդի առջև՝ որոշում ընդունել տրանսպորտի միջոցներին և հանրապետություն ուղարկվող բեռներին ու ապրանքներին Ադրբեյջանական ԽՍՀ-ի տարածքում հասցված վնասը Ադրբեյջանական հանրապետության բյուջեից փոխհատուցելու մասին:

7. Դիմել ԽՍՀՄ գլխավոր դատախազին՝ պահանջելով խիստ պատասխանատվության ենթարկել Հայկական ԽՍՀ-ի և ԼՂԻՄ-ի շրջափակման կազմակերպիչներին և իրականացնողներին, ճանապարհներին սանձարձակ արարքներ կատարողներին:

8. ԽՄԿԿ Կենտրոնական կոմիտեի, ԽՍՀՄ Գերագույն խորհրդի ուշադրությունը հրավիրել այն բանին, որ կենտրոնական մամուլի հրապարակումները, ռադիոհեռուստատեսային հաղորդումները իրենց հաճախ կողմնակալ, անիրազեկ և միտումնավոր հրապարակումներով ապակողմնորոշում են երկրի բնակչությանը, ավելի են սրում և բարդացնում առանց այն էլ պայթյունավտանգ իրադրությունը ռեգիոնում:

9. Հայկական ԽՍՀ և Ադրբեյջանական ԽՍՀ խորհրդային, կուսակցական և հասարակական կազմակերպությունների մակարդակով երկխոսություն վարել ռեգիոնում իրադրությունը կայունացնելու, երկու հարևան ժողովուրդների միջև բարիդրացիական հարաբերությունները վերականգնելու նպատակով:

**Հայկական ԽՍՀ Գերագույն խորհրդի  
Նախագահության նախագահ՝ Հ. ՈՍԿԱՆՅԱՆ**

**Հայկական ԽՍՀ Գերագույն խորհրդի  
Նախագահության քարտուղար՝ Ն. ՍՏԵՓԱՆՅԱՆ  
17 սեպտեմբերի 1989 թվականի,  
քաղ. երևան**